

20.10.2021

UKA2021/42

**Aarrit nannullu takornariatitsinermi tammajuitsussarsiorluni piniartartunut pisassiissutigineqarsinnaanngorsinnaanerit siunertaralugu Naalakkersuisut, 2022 naatinngagu saqqummiunneqartussamik, nalunaarusioqqullugit peqquneqarnissaannik inatsisartut aalajangiiffigisassaattut siunnersuut. Nalunaarusiamittaaq aningaasarsiutaasinnaanerisa aammalu nunarsuarmioqatigiit aalajangersagaasa killilersugaat qulaajarneqassapput.**  
(Inatsisartunut ilaasortaq Aslak W. Jensen, Siumut)

Aarrit nannullu takornarianut tammajuitsussarsiorluni piniartunut pisassiissutigineqarsinnaanngorsinnaanerit siunertaralugu Naalakkersuisut 2022 naatinngagu saqqummiunneqartussamik nalunaarusioqqullugit peqquneqarnissaannik inatsisartut aaliangiiffigisassaattut siunnersuut.

Nalunaarusiamittaaq aningaasarsiutaasinnaanerisa aammalu nunarsuarmioqatigiit aalajangersagaasa killilersuutaat qulaajarneqaaqqullugit Aslak Jensen siunnersuutaanut qujaffigaarput.

Taamatullu Naalakkersuisut akissuteqaataannut qutsavigalugit, Siumumiit siunnersuut imatut oqaaseqarfigissavarput.

Siunnersuuteqartup siunnersuuteqarnermini qulaajagassat taakkartugai, aammalu Naalakkersuisut akissuteqarnerminni siunnersuut akuersaaraluarlugu nunarsuarmioqataansinni apeqqutit qulaajagassat oqaatigisaat, siunnersuuteqartullu oqariartuutai ataatsimiititaliami susasaqartumi peqqissaartumik qulaajaaffiginissaat innersuupparput.

Nannunik aarrinillu piniartitsisoqartalissappat Siumumiit eqqumaffigineqartariaqartut oqaatigerusutavut saqqummiutissavavut.

Piniartitsisarneq Inatsisitigut paatsoorneqarsinnaanngitsumik naqissuserlugu inissinneqartariaqarpoq. Tamatumani piniarnermik inuussutissarsiuqartoq piniarfimminik silallu pissusaanik ilisimaarinnilluqartoq kisimi piniartitsinissaminut periarfissinneqassasoq pingaaruteqarluinnarpoq.

Aarrit eqqarsaatigalugit pisisarip niaquata tuuaavisalu anninneqarsinnaanerit ammaffigineqartoq ajorinngilluinnarparput.

Nannut eqqarsaatigalugit piniartut nannunniartartut piniartitsisinnaanerit aporfilersorneqartariaqanngilaq.

Piniartup nannumik pisaqarsinnaanerminut akuersissut nunatta avataanut tuniniarsinnaaneranut periarfissamik ammaassiffigineqartariaqarpoq.



Pingaarnepaatineqartariaqanngilaq takornariap nannup amianik  
niaquanilluunniit avammut annissisinaanisaat. Nanoq  
pisaritinneqarsinnaavoq assiliseqatigitillugulu nannuttaa.

Cites nunanullu allanut isumaqatigiissutit pituttorneqaatigisavut nunatsinni innutaasut ingammik  
piniartunut aningaasarsionnaveersaartitsisut qaangertariaqalerpavut.

Killilersukkat cites-luunniit nunatta inuinit aningaasarsiorsinnaajunnaarsitsissutigineqartarnera  
nalilersuiffigilluartariaqarparput qulaajaaffigalugulu.

Imaanngilarmi cites-qarpata allatulluunniit killilersuiffigineqarpata avataaniit  
aningaasarsiutaasinnaajunnaarsinneqassasut, pisaritinneqarsinnaapput piniartumullu  
piniarsinnaanermut akuersissutaatilimmik piniartinneqarlutik pisarissavaat, pisartillu  
assiliseqatigalugu.

Pingaarnepaajuvoq piffini piniarnermik piniakkanik assigiinngitsunik piniarnissaminnut  
akuersissutaatilinnit peqateqarnissaat, piniartunullu piniarnissaminnut akiliuteqarsimanissaat.

Aammalu piniartut piffinni sineriasuatsinni siammarsimasut kisimik piniartitsisinnaasutut  
Inatsisitigut erseqqissumik naqissuserlugu illersugaanissaat.

Siumumiit taamatut siunnersuut oqaaseqarfigalutigu ataatsimiititaliani susassaqtuni  
qulaajaaffigilluarneqarnissaa inassutigalugu oqaaseqarfigaarput.

Karl Tobiassen, Siumut